

Kolej vokasional perlu ditambah-TPM

Utusan Online

14 APRIL 2013

KLANG 13 April - Usaha keras yang dilakukan oleh Kementerian Pelajaran dalam tempoh setahun lalu berjaya meningkatkan pengambilan seramai 117,000 pelajar memasuki ke kolej-kolej vokasional di seluruh negara bagi tahun ini.

Timbalan Perdana Menteri, Tan Sri Muhyiddin Yassin berkata, perkembangan tersebut memerlukan satu langkah segera dilakukan bagi menambah jumlah penempatan para pelajar aliran vokasional memandangkan kapasiti sedia ada hanya mampu menampung 21,000 pelajar.

Beliau berkata, bagi memenuhi keperluan tersebut, kerajaan perlu menambah bilangan kolej vokasional (KV) atau mengadakan kerjasama dengan kolej-kolej swasta di negara ini.

"Permintaan yang sangat menggalakkan ini adalah hasil usaha Bahagian Pendidikan Teknikal dan Vokasional (BPTV) dan KV yang telah banyak melaksanakan program promosi melalui media arus perdana, program jelajah KV, taklimat penataran transformasi pendidikan vokasional, program konsolidasi serta persidangan kebangsaan pendidikan vokasional.

"Usaha mengangkat pendidikan vokasional di Malaysia akan dapat dicapai dengan jayanya melalui sokongan semua lapisan masyarakat," kata beliau ketika berucap merasmikan Karnival Kolej Vokasional peringkat kebangsaan di Kolej Vokasional Klang di sini hari ini.

Yang turut hadir pada majlis tersebut ialah Ketua Pengarah Pelajaran, Tan Sri Abd. Ghafar Mahmud; Pengarah Bahagian Pendidikan Teknik dan Vokasional, Ahmad Tajudin Jab; Pengarah Pelajaran Selangor, Mahmud Karim; Pengarah Kolej Vokasional Klang, Fauzyah Abdullah dan Presiden Alumni Kolej Vokasional Klang, Maznan Mustapa.

Muhyiddin yang juga Menteri Pelajaran berkata, langkah yang proaktif telah diambil oleh kementerian sejak 2009 untuk memastikan pendidikan teknikal dan vokasional di negara ini setaraf dengan negara-negara maju dan negara serantau.

"Kadar purata enrolmen pelajar aliran teknikal dan vokasional di peringkat menengah atas hanya 10 peratus di Malaysia berbanding 44 peratus di negara Pertubuhan Kerjasama Ekonomi dan Pembangunan (OECD).

"Di Jerman, Finland dan Austria, hampir 50 peratus hingga 80 peratus pelajarannya mengikuti pendidikan vokasional di peringkat menengah atau melalui program sepenuh masa iaitu empat hingga lima tahun," kata beliau.

Hakcipta Terpelihara © UTUSAN MELAYU (M) BERHAD

Source : http://www.utusan.com.my/utusan/Dalam_Negeri/20130414/dn_06/Kolej-vokasional-perlu-ditambah---TPM#ixzz2a0FeKTI9

© Utusan Melayu (M) Bhd